

Peqqussutissatut siunnersuummut nassuiaatit

Nassuiaatit nalinginnaasut

Peqqussutissatut siunnersuutip makkua imarai: Peqqussutip sunut atornissaata ersarissarneri pisariaqartut, inuttut atugarisat tunngavigalugit inissanik tunniussisarnermi malittarisassat allanngortinneri, aningaasalersuinermit pissarsiat annerpaaffissalerneqarnerat, akiliigallassutitut attartukkat pillugit malittarisassat allanngornerat kiisalu inissiaatillit inissianillu aqutsisut nakkutigineqarnerat pillugu malittarisassat nutaat.

Ilaanneeriarluni nalornissutigineqartarsimavoq inatsisartut peqqussutaat sunut atorneqassanersoq. Soorlu arlallit kukkullutik isumaqartarsimapput inatsisartut peqqussutaat aamma atuuttoq ingerlatseqatigiiffiit imaluunniit suliffeqarfiit akornanni attartortitsinernut. Taamaattoqanngilarli. Inatsisartut peqqussutaanni taamaallaat pineqarput inuit attartortuusut.

Namminersornerullutik Oqartussat kommunillu inissiaataanni attartortittakkani inissat tunniunneqartarneranni malittarisassaq pingaarneq tassaavoq inissat inoqanngitsut tunniunneqartassasut inissarsiortunut utaqqisuni allassimasunut. Tamatumani pineqanngitsut ilagaat inuttut atugarisat tunngavigalugit inissamik tunniussineq, tassa kommunalbestyrelsi pisinnaatitaammat inissiat atorneqanngitsut ilaat inuttut atugarisat tunngavigalugit inissiinissaq tunngavigalugu tunniussinnaallugit.

Inuttut atugarisat tunngavigalugit kommunalbestyrelsip inissamik tunniussisinnaaneranut tunngavituaavoq inissarsiortut allassimaffiat saneqqussinnaallugu kommunalbestyrelsip takusinnaappagu ilaqutariit inissaaruttut. Inuttut atugarisat tunngavigalugit inissamik tunineqarsinnaanerup illuatungituaraa pineqartoq utaqqisunut allatsissasoq ukiualuillu utaqqeqqarluni inissarsisinnaalissalluni.

Inuttut atugarisat tunngavigalugit kommunalbestyrelsi inummut ilaqutariinnulluunniit inunnik isumaginninneq pillugu inatsisit malillugit inunnik isumaginninnikkut pisartagalinnut inissamik tunniussiguni qularnaveeqqusissavaa attartortup attartorneq pillugu isumaqatigiisummik naammassinnissinnaanissaa. Tassalu inuttut atugarisat tunngavigalugit inissamik tunniussinermut aallaaviuvoq attartortup akiliisinnaanissaa, tassami pineqartoq inuttut atugarisamigut aningaasatigut ajornartooqqanngimmat, taamaallaalli oqqiffissaqarani, tassa inissaqarani. Taamaattoqartillugu kommunalbestyrelsip inissamik tunniussisinnaanini atorsinnaavaa inissarsiortut utaqqisuni allassimasut qulaatiinnarlugit.

Attartortup ineqarnermut inigisamilu aningaasartuutitut allanut akiliisannginnerata kinguneranik annaasaqannginnissaa qulakkeerumallugu siunnersuutigineqarpoq kommunalbestyrelsip inuttut atugarisat tunngavigalugit inissamik tunniussinermi ukioq ataaseq annaasaqarsinnaanermut qularnaveeqqusiineq atorsinnaagaa. Qularnaveeqqusiineq taanna taamaallat atorsinnaavoq ineqarnerup atorunnaarsinnerani kinguartinneqarneraniluunniit. Kommunit ataasiakkaat taamatut qularnaveeqqusiinikkut inuttut atugarisat tunngavigalugit inunnik aningaasatigut ajornartuunngikkaluarlutik inissaaleqiinnartunik inissiinermi qularnaveeqqusiinikkut aningaasatigut aarleqqutissaqanngillat.

Ineqarnermut tunngasunik nutarterinerup immikkoortua siulleq ikorfartorumallugu qulakkeerumallugulu ineqarnermut akiliutip akuerineqarsinnaasumik qaffasissuseqarnissaa siunnersuutigineqarpoq kvadratmeterimut akeq iluanaarutissat naatsorsornerannut tunngaviusussaq qaffasinnerpaaffilerneqassasoq. Sanaartorneq annertusivallaarpit illuliornermilu akit qaffarujussuarpata ineqarnermut akiliutit qaffariartornerannik kinguneqassaaq. Taamaalilluni illut assigiit marluk ukiunik ikittunnguanik akunneqarlutik sananeqarsimasut ineqarnermut assigiinngitsorujussuarnik akeqalersinnaapput sananerini aningaasartuutit assigiinnginnerisa kingunerisaanik. Tamanna illuatungilerniarlugu imaluunniit

pinngitsoortikkumallugu kvadratmeterimut aki iluanaarutissamik naatsorsuinermit ilanngunneqartussa qaffasinnerpaaffissalerneqarpoq.

Siunnersuutigineqarportaaq illuutini piginnittup aqutsisuatalu nakkutigineqarnissaat pillugu malittarisassiortoqassasoq. Illuutini piginnittoq aningaasaliissutigisimasaminiit ukiumoortumik iluanaaruteqartarpoq pisussaavoq nakkutigissallugu illuutit ingerlanneqarlutillu attartortinneqassasut malittarisassat tamatumani atuuttut naapertorlugit.

Inatsisartut 2002-mi Ukiaanerani ataatsimiinneranni saqqummiussinermit atatillugu peqqussutissatut siunnersuut KANUKOKA-mut, SIK-mut, Isumaginninnermut Suliffeqarnermullu Pisortaarfimmumut, Aningaasaqarnermut Pisortaarfimmumut kiisalu A/S Inissiaatileqatigiiffik INI-mut isummerfigeqqussutigineqarsimavoq (tusarniaatigineqarsimavoq). Aammattaaq peqqussutissatut siunnersuut KANUKOKA-mut, Aningaasaqarnermut Pisortaarfimmumut, Aqutsinermit Pisortaarfimmumut Isumaqtiginninniartarfimmullu isummerfigeqqussutigineqarsimavoq. Aammattaaq siunnersuut inatsilerinermit teknikikkut misissuutaarneqarsimavoq. Tamakku kingorna oqaaseqaatit naleqquttut tunuliaqutaralugit siunnersuut iluarsaanneqarsimavoq.

Peqqussutissatut siunnersuutip allaffissornikkut kingunissai.

Peqqussutissatut siunnersuut allaffissornikkut arlalinnik kinguneqartussaavoq. Tassalu ilimagisariaqarpoq inuttut atukkat tunngavigalugit inissiinermit tunngatillugu kommuni annertunerusumik suliassinneqassasoq. Naatsorsuutigineqarpoq nakkutilliinissaq pillugu maleruagassat nutaat illuutini piginnittunut aamma Namminersornerullutik Oqartussanut suliagarnerulersitsissasut.

Kommunip illuutiminik nammineq aqutsisuusup eqqumaffigissavaa attartortitsisutut aqutsisutullu ingerlatsinermini illuutini piginnittutut/aqutsisutut imminut nalilertussaagami nalinginnaasumik kommunitut pinnani.

Peqqussutissatut siunnersuutip aningaasatigut kingunissai.

Naatsorsuutigineqarpoq inuttut atukkat tunngavigalugit inissiisarnermut kommunit akissaajaataat qaffassasut inissat inunnut inuttut atugarisatigut aningaasatigut ajornartoortunut tunniunneqartarnerat peqatigitillugu. Taamaattorli tamatumani pineqarput aningaasartuutit kommunip pinngitsoorani akilertariaqagai, kisiannili siusinnerusukkat najugaqaqatigiiffimmi inuttut atugarisat tunngavigalugit inissiiviusuni attartortut akilertagaralui.

Kommunit Nunattalu Karsiata ilimagisariaqarpaat akiliigallassutit pillugit aqqissuussinerup eqqortinneqannginneranut tunngatillugu annaasaqarnissartik. Pingaaruteqarpoq piginnittut ineqarfinni immikkoortortat ataasiakkaat pinnatik akisussaaffigissammassuk attartortup naafferarlugu akiliigallassutini aqqissuussinermit eqqortitsinngitsuussappat.

Naafferarluguli akiligassiissutini aqqissuussinermit eqqortitsinnginnermit atatillugu annaasat attartortullu tamatuma kingornatigut inissiamit nuunnerata kingunerisaannik annaasanut akiliutissat ineqarnermit akiliutitigut akileqquneqartassappat.

Illuutini piginnittup toqqaruniuk kukkunersiuusup nalunaarusiorfigissagaa illuutini aqutsisup suliassani inatsisartut peqqussutaat aalajangersakkallu tassunga tunngasut naapertorlugit ingerlakkaa, tamatumani aningaasartuutit nammineq akilissavai. Aningaasartuutit taakkua attartortunit akilerneqassanngillat.

Naatsorsuutigisariaqarpoq Nunatta Karsia aningaasartuuteqassasoq nakkutilliinissami suliassanut nutaanut tunngatillugu, tassani pineqarsinnaallutik nakkutilliilluni sumiiffimmumut tikeraarnerit imaluunniit kukkunersiuusut nalunaarutaasa naatsorsuutillu pissarsiariniarneri. Aningaasartuutit taakku aningaasaliissutaareersut iluini akilerneqarsinnaanissaat naatsorsuutigineqarpoq.

M²-mut sanaartornermut aki iluanaarutigineqartussatut akileqquneqartoq 15.000 kr.-inik annerpaaffissalerneqarpat Namminersornerullutik Oqartussat taamatullu kommunit iluanaarutissanik annaasaqassapput.

Tabel 1: Namminersornerullutik Oqartussat illuutaat m²-mut 15.000 kr.-it sinnerlugit sanaartornermut akillit.

Kommuni	B-nr.	m ² -imut san. akia	Annertussusia	Iluanaarutissat annaasat
1	1321	15.839,00	792,30	9.971,10
9	737	15.593,09	119,90	1.066,67
9	738	15.593,09	90,50	805,12
11	680	16.017,00	537,40	8.198,04
11	691	16.017,00	475,00	7.246,13
11	705	16.017,00	354,80	5.412,47
11	715	16.017,00	417,40	6.367,44
		Katillugit	2.787,30	39.066,96

Tabel 1-imi takuneqarsinnaavoq Namminersornerullutik Oqartussat katillugit arfineq marlunnik attartortittakkanik illuuteqartut ataatsimut 2.787,3 m²-inik angissusilinnik, taakkunani sanaartornermi aki m²-imut 15.000 kr.-nit qaffasinnerulluni. Namminersornerullutik Oqartussat inissianik attartortittakkanik pigisaat tamakkerlutik 510.000 m²-it missarpiaanniillutik. Taamaammat Namminersornerullutik Oqartussat inissiaataasa 0,6 %-iisa missaat peqqussutissatut siunnersuummit attorneqartussaapput. Iluanaarutissanut annertunerpaaffissaliinerup kingunerisaanik Namminersornerullutik Oqartussat 39.066,96 kr.-t ukiumut annaasalissavaat. Namminersornerullutik Oqartussat ukiumut iluanaarutaat 62,3 mio. kr.-upput. Taamaammat annaasassat 0,06 %-iussapput.

Tabel 2: Kommunit illuutaat m²-imut 15.000 kr.-t sinnerlugit sanaartornerini akillit.

Kommuni	Inituss. tamakk.	Iluan. annaasat kr.-inngorlugit katillugit
Nanortalik	111	4.672,73
Qaqortoq	n/a	
Narsaq	1.363	50.523,47
Paamiut	-	
Nuuk	7.497	104.179,09
Maniitsoq	-	
Sisimiut	9.659	121.283,13
Kangaatsiaq	52	173,94
Aasiaat	n/a	
Qasigiannugit	579	4.371,25
Ilulissat	2.441	65.965,39
Qeqertarsuaq	1.520	10.144,36
Uummannaq	1.302	75.042,94
Upernavik	n/a	
Qaanaaq	751	22.437,45
Tasiilaq	n/a	

Itt.	n/a	
Katillugit	25.275	458.793,75

Malugeqqusaq: n/a = Kommuninit nammineerlutik inissiaatiminnik attartortittakkanik aqutsisunit paasissutissanik peqartoqanngilaq.

Tabel 2-mi takuneqarsinnaavoq kommunit ½ mio. kr.-it ataallugit annaasaqassasut kommunit tallimat paasissutissanik pissarsivigineqanngitsut eqqaassanngikkaanni. Erseqqissarneqassaaq iluanaarutissanit annaasat attartortunut taamatut annertussulinnik ineqarnermut akiliutitut appariaataassammata. Assersuutitut taaneqarsinnaavoq Sisimiuni attartornerit 154-it pineqarmata, taakku ilaat 97-it inissiaallutik marlunnik initallit. Attartornerit taakkunanga 97-init 59-it utoqqarnut inissiaapput.

Tabel 3: M²-imut 15.000 kr.-nit sinnerlugit sanaartornermut aningaasartuuteqarnikkut annaasassanik naatsorsukkat.

Inissiat amerlass.*	San. aki 15.500 kr.	San. aki 16.000 kr.	San. aki 16.500 kr.	San. aki 17.000 kr.	San. aki 17.500 kr.	San. aki 18.000 kr.	San. aki 18.500 kr.	San. aki 19.000 kr.
1	488	975	1.463	1.950	2.438	2.925	3.413	3.900
50	24.375	48.750	73.125	97.500	121.875	146.250	170.625	195.000
100	48.750	97.500	146.250	195.000	243.750	292.500	341.250	390.000
125	60.938	121.875	182.813	243.750	304.688	365.625	426.563	487.500
150	73.125	146.250	219.375	292.500	365.625	438.750	511.875	585.000
175	85.313	170.625	255.938	341.250	426.563	511.875	597.188	682.500
200	97.500	195.000	292.500	390.000	487.500	585.000	682.500	780.000
225	109.688	219.375	329.063	438.750	548.438	658.125	767.813	877.500
250	121.875	243.750	365.625	487.500	609.375	731.250	853.125	975.000

Malugeqqusaq: * Imaassorineqarpoq inissiat tamarmik 65 m²-nik angissuseqartut.

Tabel 3-mi takutinneqarpoq m²-imut sanaartornermi akit assigiinngiiaartillugit annaasat kr.-inngorlugit. Tassa annaasat 243.750 kr.-ussapput, inissiat 125-it 65 m²-iusimassappata, m²-imut 17.000 kr.-inik akilerlugit sanatinneqarsimasut. Tassunga tunngatillugu oqaatigineqassaaq annaasat ineqarnermut akiliutitut akikillisaataassammata taamaammallu 1:1-imik ineqarnermut akiliutitik appartitsissutaassallutik.

Illuutit attartortunit ineqarnermut tapiissutisartunit inigineqartut pineqassappata ineqarnermut akiliutit annikillisinneqarnerisa kingunerisaannik ineqarnermut tapiissutitut tunngatillugu ileqqaarutaasunik ilanngaaserneqassapput.

Ilaqutariit inersimasut marluk marlunnik qitornallit assersuutigissagaanni inoqutigiit ukiumut 359.500 kr.-inik isertitaqartarlutik akileraarusigassaatitaasunik, taakku 20 %-imik ineqarnermut tapiiffigineqarsinnaatitaassapput. Inigisaat 97 m²-iuvoq, m²-imut 18.000 kr.-ilerlugu sananeqarsimasooq. Ukiumut iluanaarutissanit annaaneqartarput 4.365 kr.-it, taakkunanga ilanngaatigineqassallutik ineqarnermut tapiissutissaagaluarnit ileqqaakkat 4.365 kr.-t 20 %-ii, taamaalippat annaasassat ilanngaasikkat 3.492 kr.-iussallutik. Taakku ilaqutariit qaammammut ineqarnermut akiliutaannik 291 kr.-inik appartitsissutaassapput.

Naatsorsuinerugallartut takutippaat pensionisiallit kisimiittut ineqarnermut tapiissutit allanngortinneqarnerisigut naatsorsuutigineqartumit sakkortunerusumik aningaasaqarnikkut eqqugaassasut. Tamatumunnga pissutaavoq pensionisiallit siusinnerusukkat isertitaminnit %-inngorlugu akiliisarmata ineqarnermut nammineq akiliutissat ilaannit sinnerilu ineqarnermut tapiissutitut pissarsiarisarlugit.

Taamaammat nammineq akiliutissanut ineqarnermut akiliutit qanoq issuserpiaat apeqqutaalluinnassapput. Pensionisiallit maannakkut ineqarnermut akiliutit %-iannik nammineq akiliutissamittut akiliisalissapput sinnerilu ineqarnermut tapiissutitut pissarsiarisallugit. Tamatuma kinguneraa pingaartumik pensionisiallit utoqqarnut inissiani nutaani najugaqartut immikkut sakkortunerusumik eqqorneqartalererat, inissiammi tamakku qaffasissupilorujussuarnik m²-imut akeqartillugit sanaartorneqakkajummata, allaat kr. 18.000-iniit 21.000-inut akeqartillugit soorunalumi ineqarnermut akiliutissat qaffaseqalutik.

Naatsorsuusiaagallartut tunngavigalugit m²-imut sanaartornermut akinik 15.000 kr.-inik iluanaarutissat akileqquneqartussanik annerpaaffissaliinikkut annaaneqartussatut naatsorsuutigisat ineqarnermut tapiissutinut naatsorsuutigisatut atuinikinnerussutit iluanniitneqarsinnaassapput.

Siumut akiliutissanut taarsigassarsianut akilerneqarsimanngitsunut, inimik qimatsinermut atatillugu annaasanut, ineqarnermut akiliutissanut kinguaattoorutinut ineqarnermullu akiliutissanik akilersuinnginnerup kingunerisaanik annaasassanut tunngatillugu najugaqatigiiffiit ataasiakkaat pissutsinit tamakkuningga nammatassinneqartussaassapput tamakkulu aallaaviatigut inissiamik piginnittumut iluanaarutissat akiliiffigeqatigiinneranni sunniuteqartussaangillat. Annaasaqaataajunnartut tassalu isertitassat/akilersugassat piviusunngortinneqanngitsut ukiuni tulliuuttuni ineqarnermut akiliutissat akileqquneqarneranut ilanngunneqartassapput.

Aalajangersakkanut ataasiakkaanut nassuiaatit

§ 1, nr. 1-imut

Inatsisartut peqqussutaanni kapitali 1-imi atorneqarfissaanut inissianillu innersuussisarnermut tunngasuni aalajangersakkani allannguuteqangaatsiarpoq, taamaattumillu Naalakkersuisut naleqquttuusoraat kapitali 1-ip tamarmiutillugu saqqummiunneqarnissaa.

Kapitali 1-imi § 1-imut aalajangersakkamut

Peqqussut Namminersornerullutik Oqartussat, kommunit namminersortulluunniit inissiaataannut attartortittakkanut inissianullu atorfinitsitsinermut ilaasutut tunniunneqartartunut atuuppoq, peqqussummi aalajangersakkani taakkununga atuutinnginnissaanik allassimasoqanngippat.

Attartorneq tassaavoq akiliilluni atorneq. Atorniarnert assigisaallu peqqussummi pineqanngillat. Akiliutit aningaasaanatik allaasinnaapput, ass. sulineq taamaammalu attartortitsisup sulisitsinermigut akiliisitsinermigut peqqussummi aalajangersakkat unioqqutissavai.

"Illut illullu initai ineqarfissat" tassani pineqarpoq inissiat nalinginnaasumik ilisimasavut soorlu quleriaat, uiguleriaat, sanileriaat, ilaqutariinnut ataatsinut illut, illut affarleriit, inissiaaqqat, ineeqqat inillu attartortinneqartartut peqqussummi pineqanngillat. Illunik aasarsiortarfinnik attartorneq peqqussummi pineqanngilaq, illu aasarsiortarfik attartortup najugarivinngippagu ulloq unnuarlu najugaralugu.

Illunik illullu initaanik atuinert atuisumut akillit tamarmik attartornertut taasariaqanngillat. Taamaalilluni piginneqatigiilluni inissiat pigisatullu inissiat kiisalu najugaqatigiiffiit assigiinngitsut atuisunit pigineqartut attartornertut isigineqanngillat. Inissiali taamaattut piginnittumit pisinnaatitaasumilluunniit attartortinneqarpata attartorneq tamanna peqqusutit atuuffianiissaaq.

Aalajangersakkami erseqqissarneqarportaaq peqqussut atuutinngitsoq inigitinneqarallartunut inigitinneqartunulluunniit allanut, inissiinermi akiliisitsinissaq piumasarineqaraluarpuunniit.

Aammattaaq unnuisarfimmiinnerit, akunnittarfimmiinnerit, sømandshjemmiinnerit, illuni unnuisarfimmiinnerit, ineqarfimmiinnerit assigisaallu peqqussutip atuuffianiingillat.

Assersuutigalugu peqqussut atuutinnigilaq atorfillit utaqqiisaa inissinneqarallarnerannut (vakant), tassa atorfilittut inissinneqarnissartik utaqqillugu. Peqqussut atuutinnigilartaaq assersuutigalugu peqqinnissaqarfiup taartaagallartunik inissiinerani imaluunniit sivikitsumik atorfeqartitsinerani.

Taamaattorli piumasavaoq inissiaq assersuutigalugu inissiigallarnermut atugaasoq inissianit attartortittakkanit peerneqarsimassasoq inissiigallarfassatut aalajangigaalluni. Tamanna soorlu atuuppoq pineqarpat inissaq suliffeqarfimmut illutaanulluunniit allanut atasooq, tassa inissiaq sulisunut suliffeqarfimmi tassungaluuunniit atasunut atorneqarpat.

Attartornerit akuleriit attartornermik isumaqatigiissumi ataatsimi ininik najugaqarfissatut allatulluunniit ass. inuussutissarsiornermut attartortitsineq peqqussutip atuuffianiippoq najugaqarfissamillu attartornerit isigineqarluni. Inuussutissarsiornermuinnarli attartorneq peqqussutip atuuffianiingilaq.

Peqqussutip atuuffianiingillat attartornerit inatsisikkut immikkut ittukkut malittarisassaqaartinneqartut. Matumani eqqarsaatigineqarpoq ass. atorfimmuut atatillugu inissiat aalajangersimanerusut najugaqarfigineqarnissaannik pisussaaffeqarfiusut, takuuk Nalunaerutit C, 5-1-9. Paaqqinniffimmiinneq, ass. utoqqaat illuanni assigisaanniluunniit isumaginninneq pillugu inatsit naapertorlugu sanaajusuni, peqqussutip atuuffianiingilaq.

Naalakkersuisut inissianit attartortittakkanit inissianik immikkoortitsisinnaapput. Inissiat taakku taamaalillutik attartortarneq pillugu peqqussummi malittarisassanik malinniffiussanngillat. Naalakkersuisut inissianut taakkununga innersuussisinnaatitaapput kikkunnullu innersuussinissamik qanorlu piumasaaqateqarnissamik aalajangiisuussallutik.

Namminersorerullutik Oqartussat kommuniluunniit inissianit attartortittakkanit inissiamik inissianilluunniit arlalinnik inniminniisinnaapput, taakku immikkut siunertanut atorneqarnissaat siunertaralugu, ass. inissiat aalajangersimasumut atugassat pisortanullu inissiat. Aamattaaq Namminersorerullutik Oqartussat kommuniluunniit inuussutissarsiornermut atorfeqarnermiluuunniit nuttarsinnaanermut inissianik inniminniisinnaapput. Tamanna ass. suliffeqarfiit aallarterlaat ikiorniarlugit, sulisut immikkut piginnaanillit kajungilersinniarlugit imaluunniit isumaginninnermi suliffeqarnermilu ataatsimut politikeqarnermi suliniutitut pisinnaavoq.

Aalajangersakkami erseqqissarneqarpoq peqqussut taamaallaat atuuttoq attartornerit attartortoq inuttut namminiusutut attartortuuppat. Taamaalilluni attartortoq inatsisit malillugit attartortuuppat aalajangersimasumik inuttaqarani attartornerit peqqussut atuutinnigilaq.

Assersuutigalugu inuk aktiaateqarluni ingerlatseqatigiiffimmut attartortitsisuuppat peqqussut atuutinnigilaq, kisianni aktiaateqarluni ingerlatseqatigiiffik atorfilillu attartortitsigallartuuppata peqqussut atuutissaq.

Kapitali 1-imi § 2-mut aalajangersakkamut

Aalajangersakkap kingunerissavaa Namminersorerullutik Oqartussat inissianut assigiinngitsunut soorlu ilaqutariinnut arlalinnut illunut, ilaqutariinnut ataatsinut illunut, pisortat inissiaataannut attartortittakkanut, namminersortut attartortitsisarnerannut, attartornermi isumaqatigiissusiortarnissaat. Attartornermik isumaqatigiissutit kalaallisut danskisullu naqinneqarsimassapput, oqaatsit taakku marluk atorneqarnissaat atuutilersitsinissamut piumasaaqataammat.

Kapitali 1, § 3-mi aalajangersakkamut

Inissiat inoqanngitsut qanoq tullerriarneqarlutik innersuunneqartarnissaat aalajangersakkami pineqarpoq. Inissarsiorlut utaqqisut allattorsimaffianni nalinginnaasumi allatsissimasut saniatigut Namminersornerullutik Oqartussat kommunilluunniit illuutaanni inissiat ineqanngitsut siunertanut ersarissumik taaneqarsimasunut arlalinnut innersuussutigineqassapput. Inissiat attartortittakkat piginneqatigiilluni inissiangortinneqarneranni attartortitsisup piginneqatigiilluni inissiaatillit peqatigiiffiat pisinnaatissinnaavaa inissiap inoqanngitsup inummut peqatigiiffimmi utaqqisutut allassimasumut innersuussinissaanut.

Inissiat sulisunut inissiatut atorneqartut inoqannginnerini taamatuttaaq sulisunut inissiatut innersuussutigineqassapput tamatumunnga pisariaqartitsisoqartinnagu.

Aalajangersakkap kingunerissavaa Namminersornerullutik Oqartussat inissiaataanni attartortittakkani sulisunut inissianik atuinissamut ininik Naalackersuisut tunniussisinnaanerat. Namminersornerullutik Oqartussat inissiaataasa allaffissornikkut aqunneqarnerannut aningaasartuutit attartortunut akiligassanngortinneqannginnissaat qularnaarniarlugu aningaasartuutit taakku matussuserneqarnissaannut suliffeqarfiit akileeqquneqarsinnaapput.

Namminersornerullutik Oqartussat kommunillu inissiaataanni inissarsiorlut attartortitsisup utaqqisunut allattorsimaffiutaanut allatsissapput. Inissiat utaqqisut allattorsimaffianni piffissakkuutaartumik tullerriarneqarlutik allassimanerat malillugu innersuussutigineqartassapput. Aalaja-ngersakkami utaqqisut allattorsimaffiannik aqutsisoq akileeqqusisussaatinneqarpoq. Akiliut ima aalajangersarneqartariaqarpoq utaqqisut allattorsimaffiata aqunneqarnerani aningaasartuutaasariaqartut matussuserinnaanngorlugit. Utaqqisut allattorsimaffiannut allatsinnermut atatillugu kiisalu ukiumoortumik uppersaaqqinnermut atatillugu akileeqqusisoqartassaaq.

Kapitali 1, § 4-mi aalajangersakkamut

Aalajangersakkami pineqarpoq sulisunut inissiat qanoq innersuunneqartarnissaat inissiamillu innersuunneqartumik akuersiumannginnerup suna kingunerissaneraa. Namminersornerullutik Oqartussat sulisunut inissiaatai immikkoortunut sisamanut agguataarsimapput. Namminersornerullutik Oqartussat Naalackersuisunut kiisalu Naalackersuisoqarfinni ataasiakkaani pisortaqrarfinnut pisortanut inissianik innersuussinissamut inniminniisnaapput.

Aammattaaq aalajangersakkami takuneqarsinnaavoq Namminersornerullutik Oqartussani sulisunut allanut inissianik innersuussinnginnermi pisortanut inissiat, tassa immikkoortortaqrarfinni pisortanut, allaffiit pisortaannut assigisaannullu inissiat innersuunneqartassasut. Aalaja-ngersakkami aammattaaq takuneqarsinnaavoq siulliussisinnaatitaaneq taanna taamaallaat Namminersornerullutik Oqartussat qitiusumik allaffeqarfianni pisortanut atuuttoq.

Namminersornerullutik Oqartussat sullissiveqarfiutaanni pisortat assigisaalluunniit taamaallutik siulliussisinnaatitaanermut tamatumunnga ilaanngillat kiisalu Namminersornerullutik Oqartussat sullissiveqarfiutaannut suliffeqarfiutaannullu, taakkununnga ilanngullugit Namminersornerullutik Oqartussat aktiaateqarluni ingerlatseqatigiiffiutai inissiaatillit, inissianik innersuussisarnermut Naalackersuisut malittarisassiorsinnaapput.

Inunnut Inatsisartut isumagisaanni sullissiveqarfiutaannilu sulisunut inissianik innersuussisarnermut tunngasut Inatsisartut Naalackersuisullu isumaqatigiissuteqarfigisinnaavaat. Isumaqatigiissummi ass. pineqarsinnaavoq inissianik aalajangersimasunik Inatsisartunut atugassatut immikkoortitsineq.

Kapitali 1, § 5-imi aalajangersakkamut

Aalajangersakkami pineqarpoq inissiap init amerlassusaatigut qanoq angitigisup inissarsiorlutut kiisalu sulisunut inissiamik innersuunneqarsinnaasunut innersuunneqartarnissaa. Inissiaq

sisamanik initalik tassaavoq pingasunik sinittarfilik, ataatsimik inilik kiisalu perusersartarfilik/uf-farfilik igaffillilu.

Inunnut nalinginnaasumik utaqqisut allattorsimaffianniittunut, allamut nuunnissamik kissaateqartut allattorsimaffianni imaluunniit paarlaasseqatigiinnissamik kissaateqartut allattorsimaffianni allassimasunut inoqutigiinni inuit amerlassusaat ataatsimik sinnerlugit initalimmik innersuunneqarsinnaapput. Inuit taakku taamatutaaq sumi inissarsiorusunerlutik toqqarsinnaavaat.

Tamatuma akerlianik pisortat sulisitsisullu sulisorisaminnut inissiamik innersuunneqarsinnaallutik atorfeqartunut pisussaaffeqarput. Tamatumani inissiamik innersuussineq inissarsiorutumit qinnuteqaat tunuliaqutaralugu pineq ajorpoq atorfinitsitsinermili pissutsit naapertorlugit pisarluni.

Sulisumut aalajangersimasumut tunngatillugu sulisitsisup atorfinitsitsinermut atasutut inissiamik innersuussinissaq pisussaaffigaa. Sulilersup soorunami sulilernerminit piffissap sivisoorsuunngitsup qaangiunnerani inissiamik innersuunneqarnissi naatsorsuutigissavaa.

Sulilersup sulialittut peqatigiiffiata ilaasortamik piaarnerpaamik aalajangersimasumik initaarnissaanik taamaaliornikkullu nalinginnaasumik inuulernissaanik soqutiginninnissaa naatsorsuutigisariaqarpoq.

Taamaattumik sulisup inissiamik innersuunneqarsinnaasup piaarnerpaamik sulisunut inissiamik qularnaariffigineqarnissaa ilungersuutigineqarpoq. Sulisut inissiap innersuunneqartup naatsorsuutigisaminnut naleqqutinnginneranik isumaqartut allamut nuunnissamik kissaateqartutut inigisamilluunniit paarlaannissamik kissaateqartutut allatsinnissamik imaluunniit inissianik niuernerminer neqeroortugineqartunik periarfissamik atuisinnaapput.

Paasissallugu pingaaruteqarpoq pingaartumik Nuummi inissaaleqinerup Namminersornerullutik Oqartussat sulisitsisutut pingaartumik inissianik anginerusunik, tassa sisamanik tallimanillu initalinnik pissarsiniarneranni ajornartorsiuteqartimmagit. Nuummi inissiat ilusaat imaapput inissiaq tallimanik initalik ataasiugaangat, taava sisamanik initalit pingasuusarlutik pingasunillu initalit sisamaasarlutik. Taamaalilluni inissianut tallimanik initalinnut utaqqisut allattorsimaffianniittut sisamanik initalimmut il.il. innersuunneqarsinnaanerat pissutigalugu inuit amerlassusaat inoqutigiinni inuit amerlassusaannut naapertuutissappata sulisunut inissiamik innersuunneqarsinnaasunut ataavartumik najugassaminnut sukkanerusumik innersuunneqarsinnaalissapput.

Kapitali 1, § 6-imi aalajangersakkamut

Aalajangersakkap nassataraa kommunip isumaginninnikkut ajornartorsiuteqartunut inissiamik innersuussisinnaatanerminik atuisup qularnaassammagu kommunip taamaaliornermigut najugaqatigiiffik aningaasaqarnikkut ajornartorsiorsinnaalertinnginnissaa. Ajornartorsiorsinnaalersitsinaveersarneq tamanna kommunip annaasaqarsinnaanermut qularnaveeqqusiineratigut pissaaq.

Pisuni utaqqisut allattorsimaffiat qaangerniaannarlugu kommunip isumaginninnikkut ajornartorsiuteqartunut inissiamik innersuussisinnaanerminik atuiiffiini ajornartorsiut mikisuararsuuvoq, tassami naatsorsuutigisariaqarmat kommunip annaasaqarsinnaanermut qularnaveeqqusiissutaa najugaqatigiiffimmit atuutilersinneqassanngitsaq, isumaginninnikkut ajornartorsiuteqartunut inissiamik innersuunneqartoq inissiamut atasunik aningaasartuutininik matussusiinissaminut aningaasaqarnermigut naammattumik peqarnissaa pissutigalugu. Isumaginninnikkut ajornartorsiuteqartunut inissiamik innersuussisarnermi aallaaviusaq tassaavoq attartortup aningaasaqarnermini ajornartorsiunnginnini pissutigalugu akiliisinnaanissaa inissaqannginnarnissaalu, tassa inissaaleqisuunissaa.

Pisuni kommunip inummut inissaaleqiinnarani aamma aningaasaqarnikkut ajornartorsiortumut inissiamik innersuussiffiini kommunip naatsorsuutigisariaqarpaa annaasaqarsinnaanermut

qularnaveeqqusiissummi najugaqatigiiffimmit atulersinneqarnissaa, tassami inissarsiortup inissiamut atasutut aningaasartuutit akilernissaannut naammattumik aningaasaqasannngimmat.

Annaasaqarsinnaanermut qularnaveeqqutit taamaallaat attartornerup atorunnaarsinneqarneranut kinguartinneqarneranulluunniit atatillugu annaasaqarnermut atatillugu atulersinneqarsinnaapput. Qularnaveeqqutit ukiumik ataatsimik sivilissuseqartussatut killilikkat taamatuttaaq qaammatini aqqaneq-marlunni ineqarnermut akiliutit amerlaqataannut killeqarput, taamaattorli annerpaamik 60.000 kr.-iussallutik. Eqqaamassallugu pingaaruteqarpoq kommunit taama ittumik qularnaveeqqusiinerminni inunnut inissaaleqinnartunut taamaammallu aningaasaqarnikkut ajornartorsiuteqartuunngitsunut isumaginninnikkut ajornartorsiuteqartunut inissiamik innersuussinerminnut atatillugu aningaasaqarnikkut annaasaqarsinnaalernaviannngimmata.

Attartorneq 1. juli 2003-mi atulersimappat annaasaqarsinnaanermut qularnaveeqqutit ullormit tassanga ukioq ataaseq atuutissapput. Annaasaqarsinnaanermut qularnaveeqqutit 30. juni 2004-mi atuutilersinneqarsimannngikkunik ingerlaannartumik atorunnaassapput.

Attartortup ineqarnerminut akiliisarsimannnginnera pissutigalugu qularnaveeqqutit ass. 1. april 2004-mi atuutilersinneqarsimappata qanoq annaasaqarsimatigineq suli qulakkeerneqarsimassannngilaq. Attartortitsisup attartorunnaarsitsinerata kingorna imaassinnaavoq annaasat 1. november 2004-mi aatsaat naatsorsorneqarsinnaasut. Piviusoq tassaavoq attartorneq taamaatinneqarsimasariaqartoq atorunnaarsinneqarsimalluniluunniit, kiisalu annaasaqarsinnaanermut qularnaveeqqutit atuutilersinneqannnginnerini annaasaqarsimaneq qulakkeerneqarsimassalluni. Tamatumani annaasat atuutilersinneqarsimatinnagit qularnaveeqqutit 30. juni 2004-mi atorunnaassapput. Ullup killigitinneqartup qaangiutinnginnerani piumasarineqartup naatsorsorneqarsimanissaa naammannngilaq. Ullup killigitinneqartup qaangiutinnginnerani annaasat qulakkeerneqarsimasariaqarput.

Kapitali 1, § 7-imi aalajangersakkamut

Aalajangersakkap kinguneraa attartortup inigisaminik piginneqatigiilluni inissiatut namminerluunniit pigisatut tigusiumannngitsup inissiamik taamaaqataanik innersuunneqartussaataitanera. Inissiaq malittarisassat atuuttut naapertorlugit angissutsimigut ilutsimigullu naammattuussaaq kiisalu inissiamut qimatamut aningaasartuutit sapinngisamik taamaaqataannik akeqassalluni.

Aalaajangersakkap nassataraa attartortut attartukkaminik piginneqatigiilluni inissiaatit tigusinissaq siunertaralugu piginneqatigiilluni inissiaatillit peqatigiiffiliorsimatillugit Naalakkersuisut peqqussummi matumani aalajangersakkat ilaannik uniuissinnaanerat.

Uniuissinnaaneq taamaallaat inissiap piginnittaata piginneqatigiilluni inissiaatillit peqatigiiffiannut inissiamik tigusinissamik allakkatigut neqeroorfiginninneranit qaammatit qulingiluat ingerlaneranni atorsinnaavoq. Isumaqatigiinniarnit allannngortitsinerilluunniit piffissami tassani naammassineqannngippata Naalakkersuisut peqqussummik matumanga uniuissinnaatitaanerat atorunnaassaaq.

§ 1, nr. 2-mut

Aalajangersakkap nutaatut nassataraa ineqarnermut akiliutit allannngornissaanik ilimasaarutit ineqarnermut akiliutit allannngornissaannut pissutaasunik angissusaannillu paasissutissartaqanngitsut atuuttannnginnissaat.

§ 1, nr. 3-mut

Aalajangersakkap nutaatut nassataaraa illuutip sananeqarneranut kvadrameterimut aningaasartuutit aningaasaliissutinit iluanaarutit naatsorsorneqarnissaannut angissusiliineq. Taamatuttaaq kvadratmeterimut minnerpaaffiliisoqarpoq, tassa 7.000 kr.-inut. Ineqarnermut akiliutinik iluarsaanerup tamarmiusup ilaatut pingaaruteqarpoq qularnaassallugu inissialiat nutaannginnerusut nutaanerusullu akornanni ineqarnermut akiliutit assigiinngippallaannginnissaat.

§ 1, nr. 4-mut

Aalajangersakkap nutaatut nassataaraa ineqarnermut akiliutit allanngornissaanik ilimasaarutit ineqarnermut akiliutit allanngornissaannut pissutaasunik angissusaannillu paasissutissartaqanngitsut atuuttannginnissaat.

§ 1, nr. 5-imut

Aalajangersakkap nassataaraa inissianik aqutsisup taarsigassarsinerumut uppernarsaasiornermut akileeqqusisinnaanera kiisalu akileeqqusinerup matussutissaanut qaammatikkuutaartumik akileeqqusisinnaanera. Aammattaaq aqutsisoq akiliinngitsoortoqartillugu nukingisaarummik allagaqarnermut akileeqqusisinnaavoq.

Tamatumani siunertarineqarpoq aqutsinerup ersarissuullunilu paasiuminartuunissaa. Tamatuma ilaatigut nassataaraa attartortut piumasagaamminnut namminneq akiliinissaat.

Inissianik aqutsisoq inissiamik piginnittoq sinnerlugu qularnaveeqqutinik akilersuinissamik aqutsisuuvoq. Qularnaveeqqutit tamarmiusut taamaalillutik najugaqatigiiffimmut tunngatillugu attartulernerminni tamakkerlutik ataatsikkut akilerneqarsimasutut isigineqartarput, attartortup pineqartup aningaasat taakku inissiaatilimmit taarsigassarsiarisimagaluarpagilluunniit.

§ 1, nr. 6-imut

Aalajangersagaq § 3 innersuussutigalugu teknikikkut iluarsiiineruvoq.

§ 1, nr. 7-imut

Aalajangersakkami attartortut inigisaminnik paarlaassinnaatitaanerat malittarisassiuunneqarpoq. Tamatumani piumasagaataavoq attartortut inigisaminnik paarlaannissamik kissaateqartut tamarmik immikkut attartornermik isumaqatigiisummik eqqortitsisimanissaat allamullu nuunnissamik kissaateqarlutik allatsisimanissaat.

Inissiamik paarlaattoqarsinnaanissaa anguniarlugu nutaamik attartornermik isumaqatigiissuteqartoqassaaq attartornermillu isumaqatigiissutit nutaanngitsut atorunnaarsinneqassapput. Assersuut: A, L1-imi najugalik B-lu L2-mi najugalik paarlaaterusukkunik, taakku tamarmik attartornermik isumaqatigiissutitik atorunnaarsissavaat isumaqatigiisummillu nutaamik atsiugaqarlutik. Tassa imaappoq A-p L1-imi attartornini taamaatissavaa L2-milu attartulernerminik isumaqatigiisummik atsiugaqarluni. B-p L2-mi attartornini taamaatissavaa L1-imilu attartulernerminik isumaqatigiisummik atsiugaqarluni.

Malugeqquneqarpoq aaqqissuussap tamarmi naammassineqarnissaa tatigalugu taakku marluullutik tamarmik atsiussammata. A-p L1-imi attartulernerminik isumaqatigiisummik atsioreerluni inigisani attartorunnaarpagu tamanna B-p L2-mi attartornermik isumaqatigiissutaata atuunneranut sunniuteqassanngilaq.

§ 1, nr. 8-mut

Aalajangersagaq § 3 innersuussutigalugu teknikikkut iluarsiiineruvoq.

§ 1, nr. 9-mut

Aalajangersagaq § 3 innersuussutigalugu teknikikkut iluarsiiineruvoq.

§ 1, nr. 10-mut

Aalajangersagaq § 3 innersuussutigalugu teknikikkut iluarsiiineruvoq.

§ 1, nr. 11-mut

Aalajangersakkap nassataraa inissiamik piginnittumut avataanit inissiamik aqutsisulersimasumut nakkutilliisussaataitaanermik malittarisassaqaalersitsineq. Namminersorerullutik Oqartussat kommuniluunniit avataanit inissiamik aqutsisulersimagunik nakkutilliisussaataitaanerminnik naammassinnissinnaapput aqutsisup kukkunerisuiusua inissiamik aqutsisup sulinermik inatsisartut peqqussutaat manna peqqussulluunniit naapertorlugu aalajangersakkat malillugit ingerlatsinera pillugu nalunaaruteqartitsinermikkut. Tamatumani Namminersorerullutik Oqartussat kommuniluunniit avataanit aqutsisup kukkunerinut naammassinninngitsuinerinulluunniit pinngitsuutinneqarsinnaangillat.

Inissiamik piginnittup inissiaatiminik nammineq aqutsisup sulinermi inatsisartut peqqussutaat manna peqqussulluunniit naapertorlugu aalajangersakkat malillugit ingerlanneqarnera pillugu kukkunerisuiusuminut nalunaarutigitissavaa. Naatsorsuutigineqarpoq aqutsisup naatsorsuusiornerminut atatillugu Naalakkersuisunut tamatuminnga nalunaaruteqartassasoq.

Aammattaaq aalajangersakkap nassataraa nakkutilliineq pillugu, tassunga ilanngullugu paasissutissat nakkutilliinissamut atugassat pillugit Naalakkersuisut ersarinnerusunik malittarisassiorsinnaanerat.

§ 1, nr. 12-imut

Aalajangersagaq imm. 3-usumi imm. 2-mut pinnani 4-mut kukkusumik innersuussinerup iluarsineriinnarpaa.

§ 1, nr. 13-imut

Aalajangersagaq teknikikkut iluarsiiinerinnaavoq Inatsisartut Ombudsmandiannit uparuaanerup kingorna.

§ 2-mut

Aalajangersakkap nassataraa peqqussutissatut siunnersuutip ullormit tassannga attartornernut tamanut atuutilerluni 1. juni 2003-mit atuutilernera.